

# 摩鄧女經

後漢三藏法師安世高譯



南無本師釋迦牟尼佛

## 說明

本繁體校正版《摩鄧女經》電子書，根據《乾隆大藏經》第55冊，第0639部，小乘阿含部，後漢三藏法師安世高譯《摩鄧女經》影印本校正，句讀僅作參考。特此說明。

仁慧草堂

二〇一七年九月



# 摩鄧女經

後漢三藏法師安世高譯

聞如是：一時，佛在舍衛國祇樹給孤獨園。

時，阿難持鉢行<sup>1</sup>乞食。食已，阿難隨水邊而行，見一女人在水邊擔水而去，阿難從女<sup>1</sup>乞水，女即與水。女便隨阿難，視阿難所止處。

女歸，告其母。母名摩鄧。女於家委地卧而啼。

母問女：“何爲悲啼？”

女言：“母，欲嫁我者，莫與他人。我於水邊見一沙門，從我<sup>1</sup>乞水，我隨問名，名曰阿難，我得阿難乃嫁。母，不得者，我不嫁也。”

母出行問阿難，阿難者，承事佛。

母已知，還告女言：“阿難事佛道，不肯爲汝作夫。”

女啼，不飲食，言：“母能知蠱道。”

母出，請阿難歸飯，女大喜。

母語阿難：“我女欲爲卿作妻。”

阿難言：“我持戒，不畜妻。”

復言：“我女不得卿爲夫者，便自殺。”

<sup>1</sup> 同丐，乞也

阿難言：“我師佛，不得與女人共交通。”

母入，語女：“阿難不肯爲汝作夫，言其有經道者，不得畜婦。”

女對母啼言：“母道所在？”

母言：“天下道無有能過佛道，及阿羅漢道。”

摩鄧女復言：“但爲我閉門戶，無令得出。暮，自當爲我作夫。”

母閉門，以蠱道縛阿難。

至晡<sup>2</sup>時，母爲女布席卧處。女大喜，自莊飾。

阿難不肯前就卧處，母令中庭地出火，前牽阿難衣，語阿難言：“汝不爲我女作夫，我擲汝火中。”

阿難自鄙爲佛作沙門，今日反在是中不能得出。佛即持神心，知阿難。

阿難還，至佛所，白言：“我昨日行勾食於水邊見一女人，我從勾水，我還到佛所。明日有一女人，名摩鄧，請我，欲得歸飯。我出，便牽我，欲持女與我作妻。我言：‘我持佛戒，不得畜妻。’女見阿難得脫去，於家啼哭，母言：‘其有事佛者，我道不能勝，我本不語汝耶。’女啼

<sup>2</sup> 申時，即午後三點至五點



不止，續念阿難。女明日自行求索阿難，復見阿難行勾食，隨阿難背後，視阿難足，視阿難面，阿難慚而避之，女復隨不止。阿難還歸佛所，女守門。阿難不出，女啼而去。”

阿難前白佛：“摩鄧女今日復隨我。”

佛使追，呼摩鄧女見之。

佛問：“汝追逐阿難，何等索？”

女言：“我聞阿難無婦，我又無夫，我欲爲阿難作婦也。”

佛告女言：“阿難沙門無髮，汝有髮，汝寧能剃汝頭髮不？我使阿難爲汝作夫。”

女言：“我能剃頭髮。”

佛言：“歸報汝母，剃頭髮來。”

女歸，到母所，言：“母不能爲我致阿難，佛言：‘剃汝頭髮來，我使阿難爲汝作夫。’”

母言：“子，我生汝，護汝頭髮，汝何爲欲爲沙門作婦？國中有大豪富家，我自能嫁汝與之。”

女言：“我生死當爲阿難作婦。”

母言：“汝何爲辱我種？”

女言：“母，愛我者，當隨我心所喜。”

母啼泣，下刀，剃女頭髮。

女還到佛所，言：“我已剃頭髮。”

佛言：“汝愛阿難何等？”

女言：“我愛阿難眼，愛阿難鼻，愛阿難口，愛阿難耳，愛阿難聲，愛阿難行步。”

佛言：“眼中但有淚，鼻中但有涕<sup>3</sup>，口中但有唾，耳中但有垢，身中但有屎尿，臭處不淨。其有夫妻者，便有惡露，惡露中便生子，已有子便有死亡，已有死亡便有哭泣，於是身有何益？”

女即自思，念身中惡露，便自正心，即得阿羅漢道。

佛知女已得阿羅漢道，佛即告女言：“汝起，至阿難所。”

女即慚而低頭，長跪於佛前言：“實愚癡故，逐阿難耳。今我心已開，如冥中有燈火；如人乘船，船壞依岸；如盲人得扶；如老人持杖行。今佛與我道，令我心開如是。”

諸比丘俱問佛：“是女人母作蠱道，何因緣是女得阿羅漢道？”

佛告諸比丘：“汝欲聞知是女不？”

諸比丘言：“我曹<sup>4</sup>當受教。”

<sup>3</sup> 同涕，鼻涕

<sup>4</sup> 輩也

佛言：“是摩鄧女先世時，五百世爲阿難作婦。五百世中，常相敬、相重、相貪、相愛，同於我經戒中得道。於今，夫妻相見，如兄如弟，如是佛道，何用不爲？”

佛說是經，諸比丘聞皆歡喜。

《摩鄧女經》卷終

## 迴向偈

願以此功德 普及於一切  
我等與眾生 皆共成佛道



南无护法韦驮尊天菩萨



此呪置經書中可滅誤跨之罪